

Khidmat jagaan warga emas di Darul Syifaa dipertingkatkan

Nov 27, 2018 | 05:30 AM



0



Kongsi



JALIN HUBUNGAN BELIA WARGA EMAS: Encik Amrin (tiga dari kanan) naik beca bersama seorang penghuni yang dikendali seorang belia sambil disaksikan Presiden Jamiyah, Dr Mohd Hasbi Abu Bakar (empat dari kiri) dan (paling kiri) Encik Tiwari. - Foto JAMIYAH

RUMAH rawatan Jamiyah, Darul Syifaa, telah melancarkan beberapa daya usaha bagi mempertingkatkan daya penghasilan dan inovasi dalam bidang penjagaan warga emas baru-baru ini.

Antara daya usaha itu termasuk Para Robotics, iaitu alat yang bertujuan merangsang dan membangkitkan respons emosi bagi penghuni rumah rawatan itu yang mengalami demensia.

Selain itu, Darul Syifaa juga telah memperkenalkan sejenis kerusi yang boleh mengangkat dan mengalihkan penghuni yang terlanjar sakit di katil ke bilik air serta dua alat pemulihan yang dapat antara lain menawarkan rejim senaman yang sistematik bagi penghuni.

Menurut Jamiyah, kesemua empat daya usaha itu sejajar dengan usaha pemerintah untuk mempertingkatkan Penjagaan Jangka Pertengahan dan Jangka Panjang (ILTC) bagi penduduk Singapura yang kian menua.

Dalam pada itu, Darul Syifaa turut melancarkan kemudahan Comfort Care bagi penjagaan akhir hayat di rumah rawatan yang terletak di West Coast Drive itu.

Kemudahan itu - dalam bentuk sebuah bilik khas dengan suasana selesa - membolehkan penghuni menghabiskan detik terakhir mereka di sisi keluarga tercinta sebelum meninggal dunia.

Namun, penghuni perlu mempunyai Perancangan Jagaan Lanjut dahulu, kata Pengarah Darul Syifaa, Encik Satyaprakash Tiwari.

Di bawah Perancangan Jagaan Lanjut itu, pegawai Jamiyah akan bertemu dengan penghuni dan berbincang dengan mereka tentang penjagaan lanjut yang mereka inginkan sekiranya keadaan mereka bertambah teruk.

Ini termasuk bagi mereka yang menghidap barah, masalah pernafasan serta organ yang tidak berfungsi lagi sehingga sukar untuk menjaga diri sendiri.

Encik Tiwari berkata Jamiyah merupakan badan Melayu/Islam pertama untuk melancarkan klinik Perancangan Jagaan Lanjut itu.

Semasa majlis pelancaran itu, Setiausaha Parlimen Kanan (Kesihatan merangkap Ehwat Dalam Negeri) Amrin Amin turut melancarkan program 'Berbasikal Tanpa Mengira Usia Singapura'.

Di bawah program itu, golongan belia akan membawa warga emas jalan-jalan dengan menaiki beca.

Encik Amrin menyaksikan pemeteraian memorandum persefahaman (MOU) antara Jamiyah dengan Cycling Without Age di acara tersebut.

Selain itu, beliau juga menyaksikan satu lagi MOU - antara Jamiyah dengan A*Star dan Kiwa Techwear - ditandatangani.

Di bawah MOU itu, mereka akan mengkaji stokin khas yang dilengkapi dengan cip.

Apabila dipakai, cip itu dapat mengenal pasti apakah puncanya sekiranya penggunaanya, misalnya penghuni Darul Syifaa, jatuh.

Maklumat itu dapat membantu mereka bekerjasama dengan pakar perubatan bagi mengelak penghuni daripada jatuh lagi pada masa akan datang.